

四庫全書

集部

欽定四庫全書

集部

宋詩鈔卷三十一

詳校官中書臣賈鏐

主事銜臣徐以坤覆勘

總校官編修臣王燕緒

校對官中書臣劉源溥

謄錄監生臣鄭家屏

欽定四庫全書

宋詩鈔卷三十一

內閣中書舍人吳之振編

張耒宛丘詩鈔

冬夜

山靜寒雲薄  
天空孤月明  
霜桐占堦影  
風葉繞廊聲  
經歷心難就  
蹉跎歲屢更  
冥鴻本清遠  
何事亦宵征

和西齋

山色供開鏡溪光照掩扉暗蟲先夜響萎葉近秋飛灌  
圃晴疏出開籠暮鶴歸鳴琴坐朗月輕露點秋衣

春寒

客舍逢桃李清樽聊自懽夢中驚夜雨醉裏度春寒草  
色遠還綠鳥聲晴更繁預期多病眼花發更辭看

歲暮書事五首

歲晏北風疾山空萬谷號木枯隨意折鴻斷不成高深  
屋支蓬戶煖爐暖緼袍老天元不寐鳴竹鼓蕭騷

風捲塵沙白雲垂雪意凝夜山時叫虎晚市早收燈園  
栗炮還美村醪醉不能三年官況味真是冷於冰

牛羊已歸去殘照滿山陂霜雁田中靜風驚木杪悲川  
原今自若龍虎昔交馳丘隴耕桑盡十年不復知

原廟依岡起傳聞世祖營南陽無雉雉熊耳合投兵霜  
日蓬原路天風栢殿聲山川英氣在不負昔聞名

北風吹馬疾石徑上危基野俎飽貍脯山鑪煮橡糜寒  
耕猷凍石獵火上風枝畱滯親麋鹿多慙髮欲絲

莫春三首

還將多病眼冉冉對殘春啼鳥日求侶晚花如向人物  
情懶着意杯酒最關身亦有功名志吾生付大鈞

應接非吾事溪幽興有餘筍溪鳴鳥下花薄午風疎草  
淺見飛雉溪清生細魚端居亦多趣不用席門車

紅點薔薇架綠溪桃李蹊語鶯知果熟忙燕聚新泥節  
物有常態羈游無定棲寧須說鵬鸚物理固應齊

宿東魯父店二首

夕陽低欲盡春淺色蕭條暝色催歸牧炊煙向晚樵疎  
星臨水際遠火隔村橋黯黯柴門夜栖鴉對寂寥  
郡國何時極羈愁觸處生望隨天不盡春共野兼平煙  
樹淮南濶魚鹽楚俗輕飄零五年別歎息鬢毛更

春望

鳥去晴雲外帆歸芳草邊平淮分綠野春樹接低天殘  
枿寒餘燒新青雨後田年來千里目容易淚雙懸

夜意

荒城轉五更北斗向誰傾穴闢時爭齧林栖或自驚老  
來神慮淡睡足骨毛輕石磬催僧粥低窗枕畔鳴

春望

暖日晴薰草清淮濶浸天地卑連遠水城廢入春田目  
極風燈外愁懸淚臉邊人生苦多感花柳自年年

同七兄及崧上人自墳莊還寺

和風快人意岸幘晚吟涼日落野痕碧月生淮際光論  
詩得靈運靜語屬支郎不是耽閒散從來懶性長



蔡河漲

渾渾雖未已浩浩竟東歸  
濶處長天近澄邊一鳥飛  
西風疎葦亂斜日遠村微  
淹泊從吾道扁舟伴釣磯

初秋對雨

閉戶理殘編疎慵得自便  
朝涼清病思秋雨對高眠  
屋冷深藏燕槐疎濕抱蟬  
所忻堂下菊芳意已鮮鮮

泊長平晚望

川穩夷猶棹春歸杳靄天  
翠深交岸樹綠遠望川田  
漁

酒數家市帆檣何處船登臨一回首無恨亦依然

發長平

歸牛川上渡去翼望中迷野水侵官道春蕪沒斷堤川  
平雙槳上天濶一帆西無酒消羈恨詩成獨自題

夏日五言十二首

過雨芰荷亂繁陰竹樹多雛聲知鳥哺萍動見魚過細  
逕饒苔蘚陰牆引薜蘿角巾從倒側疎懶欲如何

蚓壤排晴圃蝸涎印雨堦花鬚嬌帶粉樹角老封苔問

字病多忘過隣慵却迴晚涼還盥櫛對竹引清杯

山雨晴來暑溪雲暗復興林塘陰不解巾几潤還蒸書  
帙慵披蠹槃食厭撲蠅老來疲忝甚多病日侵陵

朝雨來還密村墟一望間遠聲唯野竹潤色但青山書  
史供高卧莓苔只閉關蕭蕭覺秋興飄颻近衰顏

細徑依原僻茅蓬四五家山田來雉免溪雨熟桑麻竹  
籠辰收果茅菴夜守瓜頗知農事樂從此問生涯

養拙貧無事溪幽樂更真簷巢偷哺子樹啄巧藏身竊

果驚知主移居蟻過隣老夫朝食美薦俎有谿鱗

謝守常搜句陶潛亦效官徬溪分水細過嶽得天寬布  
種隨蔬隴尋香到藥欄野裝兒稚笑繩屨鹿衣冠

久與山川約那無風月情經營元濶畧疎放自平生山  
友招相見鄉書向遠征慙勤語歸計貧病苦難成

種藥幽人事還披本草經出山拋舊翠過雨有新青術  
受壺中秘方傳肘後靈不辭勤服餌爲變髮星星

陶令拋官易龐公去隱溪由來浮世事可見昔人心卜

築間多思奔馳病不禁簷楹來驚雀鸞鶴自山林

蛩怨青莎老螢飛積水溪庭除延夜色砧杵發秋心雄  
劍鳴初匣寒衣補硬針老來詞賦懶從使二毛侵

夜色川原合秋聲草木催星辰隨地濶河漢寫山來栖  
鶴涼先警飢鳥夕未回高樓對斜月鳴笛正清哀

蒙恩除奉常有感

平生秉周禮投老奉龍旂斥逐偶不死歸來敢恨遲門  
闌走賓客行李飭妻兒又踏長安道多慙鬢有絲

冬日雜興六首

小園晴自掃，曝日坐前軒。  
野鼠穿山葉，寒烏啄草根。  
短籬藩隙地，別徑入孤村。  
幽趣供岑寂，淹留不復論。

水落橋痕在，沙乾岸草枯。  
霜餘槐老壯，風際竹清疎。  
啄木高逾響，鵲鷁飛且呼。  
二年親友絕，唯有對禽魚。

池館畱餘雪，西山照夕曛。  
臘催梅蕊近，春向鳥聲新。  
愁思仍當病，風光欲近人。  
年年桃李樹，相對只傷神。

空山身欲老，徂歲臘還來。  
愁怯年年柳，傷心處處梅。  
綠

蔬挑甲短紅臘點花開冰雪如何有東風日夜回  
南壁蒼崖壯窮冬井落聞風聲先老樹日色避諸山落  
雁飢相向啼烏夕自還微微寒月影蓬戶已深關  
擊柝山城閉疎燈野店扃疾風鳴夜谷晴水動浮星霜  
翼歸何晚鄰機織未停短歌時自和愁絕更誰聽

建平途次

野橋田徑滑官路柳條新流水伴遲日野花畱晚春點  
空知去翼衝綠有歸人自笑諳岐路無勞更問津

北橋送客

橋上垂楊繫馬嘶  
橋頭船尾挿紅旗  
船來船去知多少  
橋北橋南長別離  
亭上幾傾行客酒  
遊人自唱少年辭  
百年回首皆陳迹  
浮世飄零亦可悲

九日獨遊懷故人

故人分散在天涯  
九日登臨獨嘆嗟  
人世光陰催日日  
鄉間時節自家家  
風煙滿眼臨秋盡  
鼓角荒城送日斜  
取醉憑誰正烏帽  
遣愁猶強挿黃花



夜

木落風高砧杵傷孤城更漏入秋長寒生疎牖人無夢  
月過中庭樹有霜報落梧桐猶墮葉知時蟋蟀解親牀  
年年多病渾無寐靜對楞嚴一炷香

春日

輝輝暖日弄遊絲風軟晴雲緩緩飛殘雪暗隨冰筍滴  
新春偷向柳梢歸可惜客鬢蹉跎老每惜梅花取次稀  
何事都城輕薄子買驢沽酒試春衣

探春有感二首

出城但怪風光老  
草色蒼茫柳色淡  
煙樹遠浮春縹緲  
風光不動日陰沉  
芳郊未厭繁紆入  
美酒何妨取次斟  
羸馬青衫亦何事  
一生空負野人心

柳萼蒙茸待放綿  
櫻桃新葉大如錢  
深春冷落花殘後  
寒食朦朧月淡天  
獨坐每將詩作伴  
遣愁安得酒如泉  
傷心千里休凝望  
城外東風草滿川

暇日同孫畢二同舍遊李氏園亭

蕩蕩東風散客心出門驅馬問園林  
花房待暖徐徐放柳色隨春旋旋深  
城郭遠來無俗客松篁深處有幽禽  
主公畱壁題詩句應許騷人盡日吟

暮春

夜雨輕寒拂曉晴牡丹開盡過清明  
庭前落絮誰家柳葉裏新聲是處鶯  
白髮生來如有信青春歸去更無情  
便當種秫長成酒遠學陶潛過此生

將至壽州初見淮山二首

浩蕩平波欲接天天光波色遠相連風鳴兩槳初離浦  
岸轉青山忽對船澤國秋高添氣象人家南去好風煙  
步兵何必江東走自有鱸魚不直錢

晚繫孤舟古岸隈蒹葭風定渚鷗回山無野色蒼茫去  
月向淮心晃蕩來秋色解將愁並至年華偏與客相催  
青衫手板徒勞爾富貴功名安在哉

將別普濟二首

老松疎竹寺門幽九月輕寒襲客裘漠漠淮煙天際晚

蕭蕭山雨坐中秋  
風前紅葉知時落  
籬下黃花對客愁  
爲語老僧無我笑  
此生終待老林丘

孤城淮北晚鐘殘  
落日橋邊送客鞍  
物外樓臺秋更豁  
山溪松竹晚多寒  
窻風細細侵衣冷  
簷雨蕭蕭到夜闌  
佳境欲畱嗟不可  
塵埃蹤跡但悲歎

發泗州

萬艘獵獵戰風桅  
我亦孤舟別岸隈  
漠漠曉雲生木末  
蕭蕭飛雨送帆開  
消磨歲月書千卷  
零落江湖酒一盃

因病得州真漫爾功名於我亦悠哉

夏日雜興二首

墻下溪流清且長夾溪喬木雨蒼蒼  
晨風翠果擎枝重照水圓荷舞葉涼  
蝸殼已枯黏粉壁燕泥時落污書牀  
南山野客閒相過贈我能攜藥滿筐

疎圃茅齋三畝餘溪光山影動浮虛  
病妻老去唯尋藥稚子年來解愛書  
中散無堪心放蕩馮君已老興蕭疎  
全真養素安吾分敢謂軒裳不我如

送楊補之赴鄂州支使

相逢顧我尚童兒二十年來鬢有絲  
涕淚兩家同患難  
光陰一半屬分離扁舟又作江湖別  
千里長懸夢寐思  
何日粗酬身世了卜鄰耕釣老追隨

送楊念三監簿侍行赴鄂渚

楚天南去水冥冥鄂渚悠悠到幾程  
京洛信稀千里隔  
江湖春盡一帆輕莫辭送別青春滿  
會是相逢白髮生  
飽讀詩書取卿相不應如我老無成

寄榮子雍二首

東風三月洛陽城，傾蓋相逢氣倍增。  
看盡園花方信馬，飲斜樓月更挑燈。  
年光飄忽雙馳轂，心事蕭條一老僧。  
酒病年年慵把筆，新文寄我苦憑陵。

家家新酒滴新醅，殘歲崢嶸春欲回。  
霜野寂無新到雁，雪林寒有欲開梅。  
關河路永雙橫轍，天地身閒一舉杯。  
酬答風光千點淚，怯將愁眼更登臺。

陳履常惠詩有曾門一老之句，不肖二十五歲謁



見南豐舍人於山陽始一書而褒與過宜陽有  
同途至亳之約未以病不能如期後八年始遇  
公於京師南豐門人唯君一人而已感舊慨歎  
因成鄙句願勿他示

南豐塚木已蕭蕭猶有門人守一瓢  
文彩自應傳壺奧  
典刑猶可想風標紛紛但見侏儒飽寂寂  
誰歌隱士招  
十載弊冠彈未得簪纓知復爲誰影  
君知已甚多未聞  
特達之薦可無嘆  
耶

泊舟候水

一水悠悠斷復連  
卸帆終日小灘前  
青旂招飲篙工醉  
五兩歌風賈客眠  
樹色遠分芳草路  
鳥行斜斷夕陽天  
漁舟慣伴危檣宿  
饋我霜鱗不用錢

同李十二醉飲王氏牡丹園二首

東風窮巷只埃塵  
誰見城南萬朶新  
不問主人聊一飲  
爲攜佳客送餘春  
比君意氣三年老  
貸我疎狂一味真  
醉裏尚能馳馬去  
看君倒著接羅巾

吹盡紛紛桃李塵  
天香國豔一翻新  
正過穀雨初晴日  
分得西都太半春  
舊態似推新豔好  
紅芳不似淡粧真  
予嗟久得丘園意  
何日相逢一幅巾

晝卧懷陳三時陳三卧疾

睡如飲蜜入蜂房  
懶似遊絲百尺長  
陋巷誰過居士疾  
春風正作國人狂  
吟詩得瘦由無性  
辟穀輕身合有方  
欲餉子桑歸問婦  
一瓢過午尚懸牆

將至海州明山有作

望望孤城滄海邊  
好雲深處是人煙  
鳥飛山靜晴秋日  
水濶人閒熟稻天  
旂影遠搖沽酒市  
棹歌歸去隔村船  
功名富貴非吾事  
誓斲明山數畝田

秋日登海州乘槎亭

海上西風八月涼  
乘槎亭外水茫茫  
人家日暖樵漁樂  
山路秋晴松柏香  
隔水飛來鴻陣濶  
趁潮歸去櫓聲忙  
蓬萊方丈知何處  
煙浪參差在夕陽

屋東

蒼鳩呼雨屋東啼  
麥穗初長燕子飛  
竹裏人家鷄犬靜  
水邊官舍吏民稀  
溪聲夜漲寒通枕  
山色朝晴翠染衣  
賴有西隣好詩句  
賡酬終日自忘飢

題齋壁

松庭日午聽啼鶯  
簾外人稀睡老鈴  
已歎近秋添白髮  
更因多病讀黃庭  
江魚未上烹難致

江魚未上則不漁  
丹陽暑月絕無魚

吳酒空斟醉易醒  
好住安心莫惆悵  
此身天地一浮萍

己卯十二月二十日感事

蹉跎流落已華顛又見荆湖一歲遷人怯苦寒愁日短  
天收殘臘放新年園林寂歷飄梅後里巷經過爆竹前  
自料知非猶得在潛心久學衛蘧先

未將之臨淮旅泊泗上屬病作迎候上官不敢求  
告北歸尤劇疎拙無以自振但自憫歎耳

謀身不解免飄蓬零落孤舟西復東雙鬢雖青應早白  
病顏更醉不成紅崎嶇避俗人難合憔悴多愁疾易攻  
萼菜碧鱸秋正美步兵終欲向江東

望龜山二首

淮上風高寒日西  
龜山嶺下山雲歸  
遊人苦恨日已晚  
青山自與雲爲期  
輕舟漁子犯煙去  
照水白鷗窺影飛  
人間不作逍遙客  
老又塵埃空滿衣

日落看山山更青  
原頭啼鳥已春聲  
可憐山近不能到  
盡日與山相對行  
雲裏人家自來往  
天邊樓閣遠分明  
白鷗不解游客意  
驚起碧煙深處橫

次韻答存之

環堵蕭然汝水隈孤懷炯炯向誰開青春不覺書邊過  
白髮無端鏡上來祭竈請鄰聊復爾賣刀買犢豈難哉  
故人休說封侯事歸釣江天有舊臺

離天長寄周重實

相逢握手便忘形射策天門盡弟兄浮世有誰尊道義  
青衫自笑爲功名高談未盡胸中意作別猶如夢後驚  
半夜扣門投野寺天寒孤月更分明

題堂下桐



零落當軒兩樹桐  
秋來相伴一衰翁  
寒枝向月空餘影  
墮葉知時不待風  
故國山川天黯淡  
美人音信雁西東  
歲華節物俱寥落  
滿眼牢愁賴酒攻

登海州城樓

城外滄溟日夜流  
城南山直對城樓  
溪田雨足禾先熟  
海樹風高葉易秋  
踈傳里閭詢故老  
秦皇車甲想東游  
客心不待傷千里  
檻外風煙盡是愁

秋日憶家

汨汨流光長遠客年年秋至是離家孤城入夜寒更迥  
霜月滿天歸夢賒城老桐風後葉娟娟疎菊雨殘花  
茅簷布被猶無力長走塵埃真可嗟

七言

飛鴻歸盡鷺將還亭院深沉人倚欄斜搭鞦韆寒食雨  
已黃楊柳暮春寒密裝杏萼紅如糝半落梅花香未殘  
人世年年非舊事感時唯有淚汎漣

京師廢宅

當道朱門白晝扃高堂歌吹久無聲古窗積雨昏殘晝  
朽樹經陰長寄生門下老人時洒掃舊時來客歎平生  
艷姬驕馬知何處獨有庭花春自榮

登城樓

沙雨初乾巾褐輕獨披衰蔓步高城天晴海上峰巒出  
野暗人家燈火明歸鳥各尋芳樹去夕陽微照遠村耕  
登樓已恨荊州遠況復安仁白髮生

送泗州推官王永年致仕還鄉王年四十而致仕

士大夫所少也

爲憶田園便拂衣休官退勇似君  
掃塵埃擺脫青衫去  
閭里驚嗟白髮歸南畝稻粱仍歲熟舊山芝朮入秋肥  
百年從此皆閒日寄語人間浪是非

和即事

溪如圓塹木如城魚鳥從遊信此情  
啁雀踏枝飛尚裊  
仰荷承雨側還傾彈琴廢久重尋譜種藥多求旋記名  
于世久判無妙策直應歸學老農耕

自海至楚途次寄馬全玉

迂踈懷抱獨君知  
杖拂親依卽我師  
一句未能參妙道  
數篇空復得新詩  
子方奮迅雲間翮  
我厭追隨世上兒  
安得巖垆兩如志  
銅駢烏几爲君攜

蕭蕭柳岸野風秋  
虹挂前山晚雨收  
回首孤城空綠樹  
滿川斜日放歸舟  
年來雙淚供愁盡  
老去勞生幾日休  
試問故人思我否  
夢魂猶在海邊州

高城欲去更徘徊  
病眼登臨強一開  
風物盡爲愁裏景

山川疑是夢中來  
此生雙髻何勞白  
未老塵心可得灰  
欲把煩愁付盃酒  
祇應清夢待尊罍

生涯飄泊一航輕  
浩蕩晴川送我行  
北望山川連海壯  
南來風月近淮清  
人家稻熟豐年滿  
澤國天高秋意生  
唯有羈愁消不得  
登臨清淚落如傾

蕭蕭晚雨向風斜  
村遠荒涼三四家  
野色連雲迷稼穡  
秋聲催曉起蒹葭  
愁如夜月長隨客  
身似飛鴻不記家  
極目相望何處是  
海天無際落殘霞

夏日三首

長夏村墟風日清  
簷牙燕雀已生成  
蝶衣曬粉花枝午  
蛛網添絲屋角晴  
落落疎簾邀月影  
嘈嘈虛枕納溪聲  
久判兩鬢如霜雪  
直欲樵漁過此生

黃簾翠幕斷飛蠅  
午影當軒睡未興  
枕穩海魚鑄紫石  
扇涼山雪畫青絳  
廊陰日轉彫欄樹  
坐冷風生玉盃冰  
滿案詩書塵蠹甚  
故應疎懶過炎蒸

棗徑瓜畦經雨涼  
白衫烏帽野人裝  
幽花避日房房歛

翠樹含風葉葉涼養拙久判平藏姓字置身安事巧文章  
漢庭卿相皆豪傑不遇何妨白髮郎

和晁應之大暑書事一首

蓬門久閉謝來車畏暑尤便小閣虛青引嫩苔畱鳥篆  
綠垂殘葉帶蟲書寒泉出井功何有白羽邀涼計已疎  
忍待西風一蕭颯碧鱸東鱸意何如

遣興次韻和晁應之四首

老去詩書倦討論一尊相對尚慙勤鍛鑪放蕩狂中散



書閣蕭條老子雲要路交親嗟隔濶他鄉耆舊飽知聞  
衰遲多病頭風甚解寄斯文獨有君

西風浙浙滿征衣天畔危亭面翠微雲解映山常漠漠  
葉知辭樹亦依依苦飢黃鵠猶謀食無事輕鷗得遠飛  
落日秋風滿江漢杖藜三嘆未能歸

夜泛孤舟清洛津宓妃輕步若爲親清涵星漢光垂地  
冷覺魚龍氣近人鏡裏悲秋雙鬢髮馬邊隨客兩京塵  
愁心欲比東流水衮衮無窮日日新

蓬門鳥雀啁黃昏歸逕牛羊各有羣水濶蛟龍陰後出  
山空虎豹夜深聞西來谷引秦川雨南去秋連楚澤雲  
唐漢廢興無處問西風禾黍但丘墳

自巴河至蘄陽口道中得二詩示仲達與秬同賦  
落月娟娟墮半環嘔鵝鳴櫓轉荒灣東南地缺天連水  
春夏風高浪卷山旅食每愁村市散近秋已覺暑衣單  
自慙老病心兒女三日離家已念還

浩浩渾流卷白沙中流鼓楫四無涯喜逢山色開眉黛

愁對江雲起砲車雨足川原豐稻菽日斜鷗鷺滿蒹葭

長年怕作扁舟客賴有高談一笑譁

舟人占雲若砲車起輒急避乃大風

候也驗之信然

離富池望廬岳是日入夾口直達潯陽遂舍大江

### 之險示同行

山秀江清三百里與君三宿一扁舟飲殘桑落溪雲暮  
卧冷桃笙楚雨秋舟隱長江逢夾口眼明五老立雲頭  
幾年澤國行將遍歸與親朋說舊遊

二十三日卽事

已逢斌媚散花峽不怕艱危道士磯啼鳥似逢人勸酒  
好山如爲我開眉風標公子驚得意跋扈將軍風歛威  
到舍將何作歸遺江山收得一囊詩

渡洛因泛舟東下數里頗意淮上

云云清洛轉山隈渺渺東流不復回輕鳥竟隨青嶂去  
亂波爭泛夕陽來偶驚舟楫鄉心起乍脫塵埃病眼開  
疑是盱眙郭門外月明帆席過清淮

縣齋

只合門如野叟家  
市朝聲利苦諠譁  
但知得醉頻沽酒  
何處逢春不見花  
暗樹五更雞報曉  
晚庭三疊鼓催衙  
知君宰邑端無事  
吟笑何妨到暮鴉

和周廉彥

天光不動晚雲垂  
芳草初長襯馬蹄  
新月已生飛鳥外  
落霞更在夕陽西  
花開有客時攜酒  
門冷無車出畏泥  
修禊洛濱期一醉  
天津春浪綠浮堤

春日遣興二首

流光向老惜芳菲搔首悲歌心事違  
綠野染成延晝永亂紅吹盡放春歸  
荆榛廢苑人閒牧風雨空城鳥夜飛  
斷送一翻桃李盡可憐桑柘有光輝

日烘烟柳軟於絲桃李成塵綠滿枝  
芳草有情隨處好落花無賴信風吹  
關心傷感知何處過眼芳菲能幾時  
一病春來妨痛飲遣愁唯有強裁詩

遣興次韻和晁應之二首

日落村墟煙靄青草根促織晚先鳴羣山袞袞望中去  
新月娟娟愁裏生暗峽風雲秋慘淡高城河漢夜分明  
寄書故國還羞澁白首蕭條老病嬰

露下風悲螢火流周南羈客意悠悠山川老去三年淚  
關塞秋來萬里愁慣逐魚禽諳異俗每因霜月夢滄洲  
一拋硯井雙蓬鬢天畔詩成獨倚樓

僦居小室之西有隙地不滿十步新歲後稍暖每  
開戶春色鬪進戲名其戶曰嬉春因爲此詩

蒼蒼老檜已消雪冉冉煙蕪欲鬪妍  
圍得青春數畝地  
斷將平楚一方天  
春風入戶如相覓  
新月低窗最可憐  
老子婆婆便終日  
一壺春酒與周旋

發安化回望黃州山

流落江湖四見春  
天恩復與兩朱輪  
幾年魚鳥真相得  
從此江山是故人  
碧落已瞻新日月  
故園好在舊交親  
此生可免嘲傖父  
莫避北風京洛塵

離光山驛



郵亭結束問殘更斜月西南雞未鳴  
草草勞人常少睡  
綿綿遠道苦無情  
田家稔熟人情好  
野路雨餘秋氣清  
老得一州藏拙去  
鵷鷺臺閣盡豪英

卧病月餘呈子由

風葉鳴窗已復朝  
喚回歸夢故山遙  
酒壺暗淡浮塵集  
藥鼎青燐敗葉燒  
閉戶獨依寒蟋蟀  
移牀更就雨芭蕉  
雪深欲請安心術  
長日如年未易消

謁太昊祠

千里垂精帝道尊  
神祠近止國西門  
風搖廣殿松杉老  
雨入脩廊羽衛昏  
日落狐狸號草莽  
年豐父老薦雞豚  
舊遊零落今誰在  
塵壁蒼茫字半存

上元思京輦舊遊

九門燈火夜交光  
羅綺風來撲面香  
信馬恣穿深柳巷  
隨身偷看隔簾粧  
身拘薄宦安知樂  
心逐流年暗減狂  
畱滯山城莫嗟嘆  
貂蟬從古屬金張

春晚有感

洛川三月鴨鵝鳴游絮縈空塵不驚茸茸草色鋪風軟  
點點楊花著水輕何處浮雲度天末不妨微雨破春晴  
江南有客增歸思悵望汀洲蘋芷生

次韻張公遠二首

襄王坐上徵詞客子建車前步水妃瞥過低鬟流盼處  
爭先含笑獨來時東邊日下終無雨關上書時合有碑  
腸斷吳王煙水閣扁舟何日逐鷗夷

平淡春雲捧額浮秋光劒戟近人流無腸可斷方爲恨

有藥能治不是愁，可待挑琴知有術。  
未傳驅豆更無謀，遙知添得春窗夢。  
猶在尊前燭下羞。

泊舟都梁亭二首

旅枕無眠客夢勞，五更傷舍一鷄號。  
淮天水濶浮梁小，城郭霜晴寶塔高。  
梅鎖冷香通雀啄，水翻新綠出漁篙。  
君恩許作還鄉客，官對江蘿賦廣騷。

微春已動陳根綠，晴日初流大澤澌。  
客路苦寒唯飲酒，老年便暖屢添衣。  
霜林背日梅遲拆，冰渚知春雁早飛。

江上三年陳迹在年年穿竹摘梅時

都梁雪天晚望

浮梁淮面欲龍騰金碧浮屠間玉層古岸蕭條風卷雪  
長河咽絕水浮冰畱連淮汴殘年客蹭蹬塵埃一老僧  
聞道都梁梅未拆可隨桃李畏嚴凝

舟中書事

久客益知行路難鏡中雙髻不須看山川積雪堅冰地  
舟楫長淮古汭間餽費主人勤俗禮書來故里勸加餐

北歸漸踏塵埃道盡日危亭且看山

讀黃魯直詩

江南宿草一荒丘試讀遺編涕不收不踐前人舊行迹  
獨驚斯世擅風流一尊華髮江邊客萬里黃茅嶺外州  
虎豹磨牙九關邃重華可訴且南遊

辛巳歲魯直見  
余黃州江上

離山陽入都寄徐仲車

孤城芳樹碧層層村落黃昏只見燈回首事如前夕夢  
出門心似下山僧仕求行道時難偶意欲謀閒力不能

寄語東臯多釀酒待余歸日解行滕

題淮陰孫簿壁

荒涼官舍對淮流樽酒相逢爲少畱  
夾道老椿鴉哺子隔牆芳草牧呼牛  
渡頭人散前村市天際帆來何處舟  
自古詩人最多感新篇應解寫騷愁

宿泗州戒壇院

樓上鳴鐘門夜扃風簷送雨入疎櫺  
老僧坐睡依淡壁童子持經守暗燈  
千里塵埃長旅泊五年憂患困侵陵

誰知避世天然子一見禪翁便伏膺

天然丹霞也

宿柳子觀音寺

黃塵滿道客衣穿古寺荒涼暫息肩  
倦體卧來便穩榻汗顏濯去快寒泉  
野僧治飯挑蔬至童子攜茶對客煎  
夜久月高風鐸響木魚呼覺五更眠

已未早春有感

南國柳黃鶯未知人情何事恨春遲  
雪抽宿麥晴來葉雨長枯榆燒後枝  
載酒有誰尋寂寞受薪只合學支離



近知壁觀安心法亦擬平治不作詩

同袁思正諸公登楚州東園樓

杖藜蕭颯對雲沙白首逢春只歎嗟  
身老易傷千里目眼驚還見一年花  
地平曠野連雲直天帶清淮向海斜  
尚有風光供醉筆我生詩酒是生涯

同周楚望飲花園

杖藜攜手踏青苔蕭洒池亭爲客開  
柳色漸經秋雨暗荷香時與好風來  
斜陽似欲粧詩句新月邀將入酒杯

身世已甘長寂寞忘形賴有子徘徊

赴官壽安泛汴

西來秋興日蕭條昨夜新霜緝縵袍開遍菊花殘藥盡  
落餘寒水舊痕高蕭蕭官樹皆黃葉處處村旗有濁醪  
老補一官西入洛幸聞山水頗風騷

寄蔡彥規兼謝惠酥梨

洛川北岸錦屏西竹樹蕭蕭面翠微風月有情常似舊  
山川信美不如歸文章送老甘無用魚鳥從游久息機

寄語長安倦遊客年來何事素書稀

三鄉懷古

清洛東流去不還漢唐遺事有無間廟荒古木連空谷

宮廢春燕入亂山

光武祠連昌宮

南陌絮飛人寂寂空城花落

鳥關關登臨幾度游人老又對東風鬢欲斑

水軒書事招壽安僚友

官閒不覺簿書勞一簟清風午枕高靜拂小屏圖女几  
就書新竹記離騷城空鬪雉孤飛健柳暗雛鶯學語嬌

東縣官曹誰過我欲酤村酒具山庖

官舍歲暮感懷書事三首

衙鼓襲襲送夕陽經時無客上高堂  
淵明柳老秋多雨  
子敬氈寒夜有霜  
山樹葉稀晴摘果  
齋爐灰暖曉焚香  
經綸自有英雄在閒散須教屬漫郎

脩竹高槐交映門公居瀟灑近山雲  
醉眠多似陶彭澤  
官况貧於鄭廣文  
秋菊擣塵供曉餌  
寒松收子和香焚  
經年門巷無車馬只有清風伴此君

霜菊娟娟尚有花  
蕭條廳樹暮棲鴉  
萬竿脩竹開侯府  
十里青山隱相家  
麋鹿並游諳野性  
詩書相對是生涯  
冷官自有貧中樂  
敢向朱門肉食誇

春陰

漠漠重雲向晚低  
臘寒新去有餘威  
風捎簷滴難開幌  
潤引爐香易着衣  
把酒自傾金錯落  
探春誰汙錦障泥  
山城冷落無歌舞  
只有芳醪取次攜

至日有感

一卧孤村兩見冬獨搔華髮思無窮荒山極目漫汗雪  
老樹當庭晝夜風佳節妻兒具樽酒茅齋斟酌慰愁翁  
未央曉賀瞻天冕正在爐煙縹緲中

歲暮福昌懷古

少年詞筆動時人末俗文章久失真獨愛詩篇超物象  
祇應山水與精神清溪水拱荒涼宅幽谷花開寂寞春  
天上玉樓終恍惚人間遺事已埃塵

李賀宅

永城道中

東行十日何所有衰草白茅梁宋陂天風官樹吹半折  
欲雨野雲垂不飛十年所遇半陳迹千里獨愁懷所思  
他日江湖片帆去白頭青鏡久相期

送曹子方赴福建運判

平生鄴下曹公子家世風流合有文橫槊尚傳瞞相國  
紫髯不是畫將軍詔書寬大民何怨刺史威嚴吏合勤  
好作楚詞更下俚雲中一降武夷君

和無咎二首

年芳經雨能幾許客愁得暖不肖融眼看乳鵲行已哺  
手種小桃隨分紅世情付睡莫涇渭物態逢春無異同  
清時賴是未禁酒須惜紅紫轉頭空

愛酒苦無阿堵物尋春那有主人家未容黃蜂釀成蜜  
已怕惡雨不容花雲間明月誰可攬海中蟠桃良未涯  
浮名誤人不得脫黑髮減來那復加

雙槐晚秀三月一日初見新葉

東皇無處著繁華亦復分張到我家他日老蒼悲敗枿



今晨嫩綠出新芽  
禿翁承弁纖纖髮  
村婦縈鬟草草花  
桃李蹊中人迹絕  
綠陰門巷正藏鴉

秋思

故帷陳迹生蛛網  
古殿苔深疊綠繒  
簷雨晚秋鳴槁葉  
窗風深夜觸孤燈

送李十之陝府

斷蓬泛梗偶相依  
一別重逢又幾時  
人世悲歡消遣盡  
爲君流淚忽沾衣

余向集賢殿試罷寓居京師常游西岡錢昌武郎  
中之第時同會者河東柳子文與錢氏三子夏  
中余出京今纔半年而昔日所游者或東或西  
有不知所如者古人所謂俯仰之間已爲陳迹  
者歟夫求昨日之我於今日終其身而不得而  
況偶然相值聚而旋散者歟追記春睡詩一首  
乃寓錢第所爲者

東風冷峭着衣寒雲影陰沉美睡天  
青杏園林花落盡

晚風吹雨濕鞦韆

上元都下二絕

淡薄晴雲放月華  
晚粧新暈臉邊霞  
管絃樓上爭酤酒  
巧笑車頭旋買花

驕馬金鞭白面郎  
雙鬟小女坐車箱  
輪聲轆轤歸何處  
畱得紅籠絳臘香

別錢筠甫三絕句

倦客無眠聽曉鐘  
五更蠟燭淚銷紅  
城西古寺同來處

今日分攜獨向東

春燈欲盡曉鷄啼殘月影中征馬嘶爲語相逢不須喜  
相逢終有道分離

原頭綠盡柳初芟落月滿川風滿山已過寺西三十里  
爲君回首駐征銜

田家二絕

門外青流繫野船白楊紅槿短籬邊  
早蝗千里秋田淨  
野秫蕭蕭八月天

新挿茅簷紅槿籬秋淡黃葉已飛飛灘頭水濶孤舟去  
渡口風寒白鷺啼

舟行六絕句

獵獵西風秋水清野花寒草徬流生沙邊水鶴待魚立  
石底暗蛩先夜鳴

船尾初回轉野灣波平天淨惜投竿飛飛小蝶秋花晚  
噴噴沙禽野水閒

落景秋雲晚不開天寒古岸野船回初驚波面微瀾起

已覺風前細雨來

渡頭風雨晚生寒  
蓑笠漁翁坐釣船  
爲問蓬中有漁否

一隻新鰕出籠鮮

天寒野店斷人行  
晚繫孤舟浪未平  
半夜西風驚客夢

卧聽寒雨到天明

渡頭煙雨欲昏天  
灣畔枯桑繫客船  
風打蓬窗秋浪急

一杯寒酒夜溪眠

題壽陽樓二絕

渺渺長淮去不休行人獨上壽陽樓一闕長歌不須唱

山川都是舊時愁

閑事說於子友隴西子

長淮不斷水悠悠樓上行人淮上樓誰謂滿前風景好  
古今供作別離愁

### 太湖上絕句

風蕩雲容不成雪柳偷春色故衝寒湖邊艇子衝烟去  
天畔青山隔雨看

誰道原頭春未回柳梢黃軟凍齊開爭驚臘日崢嶸盡

急問田翁乞野梅

自元後閒作五首

閨闔樓南粉署西舊時種柳長應齊  
如今冷落窮山縣  
卧聽春風百鳥啼

東風吹雨夜侵堦樓角長煙曉未開  
何事舊時愁意緒  
一翻春至一翻來

面冷春霜拂瓦乾曉風吹雨凍闌干  
柳梢黃弱梅苞破  
更放東君幾日寒



燈火人家夜不收三更明月過南樓  
風煙隨處自能樂何事客心還獨愁

喧喧野縣自笙歌風捲高雲天似波  
誰謂樓前明月好月明多處客愁多

寫情

牆外誰家桃李開何由花下一徘徊  
先教飛絮傳愁去却遣遊絲取藥來

春詞

靄靄芳園誰氏家  
朱門橫鎖夕陽斜  
鳩鳴鵲噪閒庭館  
盡日春風吹百花

看花

風暖日高花氣動  
鳴鳩乳燕自求羣  
經營美景還詩匠  
傾掃頑愁賴酒軍

晚歸

學省歸來門巷秋  
伴眠書史滿牀頭  
低雲漠漠梧桐晚  
屏上江山亦解愁

傷春

浮雲冉冉送春華  
怯見輕寒日欲斜  
一夜雨聲能幾許  
曉來落盡一城花

元忠學士八兄未離京師遠蒙追送許惠服丹法  
託故竟未惠及賦四絕句

身逐孤舟似斷雲  
故人追送尚慇勤  
秋城夜泊西風岸  
落葉悲蟲獨自聞

哀柝苦催空壁月  
悲蟲真弔短檠光  
無情少壯拋人去

只有窮愁氣味長

昔見將軍破虎韜  
玉堂曾共掃千言功名老去皆蹉跌  
相見諄諄勸學仙

無復顛狂似少時  
逢君猶自說蛾眉  
玉堂舊事君休念  
兩袖啼痕又送誰

寓楚題楊補之官舍

一辭螭陛走天涯  
客路悠悠老歲華  
住久不知身是客  
自來堂下採黃花

傷春

嫩紫妖紅惜不得，亂隨風雨點蓬蒿。  
田野草花開晚，主官春光輸爾曹。

七月十六日題南禪院壁

秋林落葉已斑斑，秋日當庭尚掩關。  
掃榻晝眠聽鳥語，可憐身世此時閒。

絕句二首

照水輕明楊柳牙，隔林相映占巢鴉。  
東風香草城邊路，

到處人家盡是花

淮上春風萬鼓鼙落帆舟泊岸邊磯喧喧野市殘陽裏  
酤酒攜魚客散歸

雨後遊朱園

綠葉陰陰護翠枝晚花雖小亦應稀東風不惜殘桃李  
吹作春愁處處飛

雜詩

病腹難禁七椀茶小窓睡起日西斜貧無隙地栽桃李

日日門前自買花

春雨中偶成二首

廉纖小雨作春愁  
吹濕長雲漫不收  
架上醪醕渾看葉  
眼明新見小花頭

春陰只與睡相宜  
卧聽鳴禽語復飛  
一縷斷香浮不散  
何人淡院畫薰衣

牆東

牆東椿老葉已盡  
堂下菊叢無復香  
長安風埃歲已晚

閉門不出馬毛長

項城道中

塵壁蒼茫有舊題十年重見一傷悲  
野僧欲與論前事自說年多不復知

懷金陵二首

壁月瓊枝不復論秦淮半已掠荒村  
青溪天水相澄映便是臨春閣上魂

曾作金陵爛漫遊北歸塵土變衣裘  
菱荷聲裏孤舟雨



卧入江南第一州

柳

永豐坊裏舊腰支曾見青青初種時  
看盡道邊離別恨爭教風絮不狂飛

晚春初夏絕句二首

少室山前日日風望嵩樓下水溶溶  
卷將春色歸何處盡在車前榆莢中

睡足高簷春日斜碾聲初破小龍茶  
樓邊綠樹飛紅盡

春色牆陰老薺花

漫呈無咎

題扇燈前亦偶然那知別後遠如天去年醉舞看花處  
獨聽琵琶却惘然

泊楚州鎖外二首

襄玉席上舊行雲二十年間生死分可惜風流一抔土  
年年春草斷人魂

流落相逢二十年羞將白髮對嬋娟如何見我都依舊

添得尊前一惘然

慈湖中流遇大風舟危甚食時風止遊靈巖寺

心悸西江浪似山眼明僧舍一窗間從今要見廬山面  
畫作屏風靜處看

觀魚亭呈陳公度

獵獵微風波面開近人鷗鷺不相猜尊前忽起扁舟興  
新管江南山水來

紹聖甲戌侍立集英殿臨軒試舉人作此兩絕

春來小殿雪初殘  
曉日曛曛未破寒  
黃繖當軒公事退  
君王緩步侍臣閒

弱歲干名翰墨場  
春寒搖筆試西廂  
茫然二十年間事  
還着春衣侍玉皇

題周丈翰郭熙山水

洞庭葉落萬波秋  
說與南人亦自愁  
指點吳江何處是  
一行鴻雁海山頭

夜聞風雨有感

畱滯招提未是歸卧聞秋雨響疎籬何當粗息飄萍恨  
却誦僧窗聽雨詩

偶題二首

相逢記得畫橋頭花似精神柳似柔莫謂無情即無語  
春風傳意水傳愁

春水長流鳥自飛偶然相值不相知請君試採中塘藕  
苦道心空却有絲

青桐道中值雨凡數里舟行久之頗有江湖之思

二首

繫馬操舟問檝師，却疑淮口挂帆時。  
人間遷改何須問，便作江湖未可知。

冥冥煙外鳥飛歸，野老得魚收網迴。  
隔浦斷霞沉欲盡，半灣新月出雲來。

福昌官舍後絕句四首

淮南梅柳想春還，怯去西州歲暮寒。  
唯有看山心未厭，清明終日在欄干。

無客門闌盡日扃兩行喬木擁寒廳吏胥借問官何在  
流水聲中看竹行

卧聽堂南布穀鳴隴頭細麥已青青慙謝汝催春種  
我爲無田豈懶耕

不掃竹根藏筍茁旋培殘雪擁蘭芽爲君更接櫻桃樹  
付與春風換却花

無題二首

風槐已疎遽如許夜蛩雖恐可若何出門蹄道苔痕滿

隱几書塵鼠蹟多

晚起清秋一枕涼  
四簷鳴雨下淋浪  
竹籠焙藥時添火  
晝榻焚香却閉房

雪溪道至四安鎮

苔雪清秋水底天  
夜帆燈火客高眠  
江東可但鱸魚美  
一看溪山直萬錢

聞蛩二絕

晚風庭竹已秋聲  
初聽空階蛩夜鳴  
流落天涯聊自得



今宵爲爾感平生

二年江海轉萍蓬  
白髮蒼顏換舊容  
新月窺簷風動竹  
宣城今夜又聞蛩

雨中題壁

去年此日泊瓜洲  
衰柳蕭蕭繫客舟  
白髮天涯嘆流落  
今年對雨古宣州

預作冬至

紫壇曾從奠琳琅  
親被天人玉冕光  
今日黃州山下寺

五更聞鴈滿林霜

宋元祐七年南郊曾與捧策在皇帝禋席左見上冕玉簪白如雪爲燭所

照出光  
數尺云

聽鳴禽

流滯江邊鬢已霜又聞春鳥啁朝陽他時北去懷陳迹

寒竹疎梅黃土岡

曉雨

輕陰江上千峰秀小雨牆邊百草生惟有春禽慰孤客

曉啼渾似故園聲

春蔬

新春書劒滯江城又見南蔬入旅羹關心太昊祠前路

小甲連畦帶雪晴

余有蔬園在陳州太昊祠前

春日懷淮陽六絕

西城門外古壕清太昊祠前春草生早晚粗酬身計了  
長爲閒客此間行

靈通禪刹古叢林永日惟聞鐘梵音閱世興亡千室佛

百年風雨古牆金

靈通院石晉末所創有千佛殿壁繪用金

最愛南城汲井園春來蔬甲不勝繁人家斷處無鷄犬  
遲日東風似古原

黃巢塞南琵琶溝古原芳草靜春流大艣舸舫何處客  
檣竿西北是神州

莽莽郊原帶古丘漸漸隴麥散羊牛杏花楊柳春濃處  
一片青帘慰客愁

城中萬枝木芍藥姚黃一萼得春多日日踏春渾坐此  
人間無醉奈渠何

上元三絕句

清晨謁帝大明宮拜賜歸來夜過中

余在秘書近十年每歲上元晨趨大

慶迎駕近午駕回駐輦大慶門上賜茶酒拜謝退率一二同舍擇勝縱觀至夜分必醉歸歲率爲常一夢

十年身老矣山城風月作過從

酤酒壚邊人若市算商亭下浪連天張君官況今如此

豈有工夫作醉眠

江邊燈火似秋螢哀怨山歌不可聽自怪今春牢落甚

禪房止酒讀黃庭

春日書事

蟲飛絲墮兩悠颺人意遲遲日共長  
春草滿庭門寂寂  
數櫺窗日挂空堂

柯山雜詩二絕句

幽人睡足岸綸巾策杖開門卯酒醺  
黃葉滿山烏鵲噪  
江城秋日少人行

蕭蕭茆屋土山前翁媪關門去穫田  
朝日滿簷鷄犬靜  
荻籬溪處有炊煙

絕句九首

天高列岫出林外  
霜落大江流地中  
晚日橋邊數歸牧  
牛羊部分聽兒童

樹頭三唱雞賓日  
門外斜行雁寄書  
十月江城霜霰薄  
滿山林葉亂藍朱

曉起山鴉噪作團  
西園霜木倚空寒  
風高斷雁呼前伴  
雨止歸雲赴舊山

千林黃葉摠飛霜  
寂歷疎梅未宥粧  
誰信輪囷卧山木

心知九地有微陽

空山風雨冷蓬茅  
晨起幽人理緼袍  
溪閉衡門且無出  
濕雲如墨怒江號

老去不禁茶力悍  
兩甌破盡五更眠  
月團三百真魔物  
欲乞當壚當酒錢

讀書老眼苦眠昏  
茗飲無端遣夢魂  
到處相逢真可喜  
祇應酒是好知聞

黃葉桑林赤土岡  
蓬茅小徑度牛羊  
似聞流冗之唐汝



歎息何人爲發倉

黃累年旱飢流民就食唐汝

歲弊寒驕風落山卧聽園木怒濤翻去年慈德門東雪

永夜宮廊喝探喧

去年春大雪中予以禮官奉欽聖喪事入宿內東門凡數十鋪直廬官吏

達旦不能寐

齋中列酒數壺皆齊安村醪也今旦亦強飲數杯

戲成絕句奉呈幽老昆仲

曾嘗玉帝碧琳腴不醉長安市上酤

作史官時歲節賜御醪

飲濕

先生今已矣啜醪畱得與門徒

東坡三年黃州城乏酒但飲濕

臘月下旬偶作

歲暮煙霜澤國寒  
曉鴉鳴處是柯山  
地爐有火尊餘酒  
自起焚香淡閉關

二月二日挑菜節大雨不能出

久將松芥芼南羹  
佳節泥濘人未行  
想見故園蔬甲好

一畦春水輓轡聲

北方治菜畦如碁枰土極細勻  
及井灌之次第相及殊可觀也

寒食日作

荒山野水非吾土  
寒食清明似去年  
楊柳揷門人競笑

吳夷不信子推賢

黃岡有官人效北方以麋作子推貫柳挿門上者邦人怪之

東堂初寒創意作竹屏障門屏脚偶得朽梅株截  
用之完固質野有可喜者二首

大室新幃用此君

如用鄮子之用

碧琅玕挿古槎根白雲一片

當空下護此寒堂宴坐人

簡冊林中老蠹魚年來窮謫尚耽書竹幃風下憑烏几  
畫作柯山居士圖

地爐

歲陰慘澹不可出竹榻地爐聊自安黃葉滿山籬落晚  
北風吹雨濕荒寒

久雨

欹簷積雨苔生瓦陋巷人稀泥及門坡下牛羊來遠墅  
舍傍麻櫟接荒村


拒移宛丘牡丹殖畦竇齋前作絕句示拒桔和

千里相逢如故人故栽庭下要相親明年一笑東風裏  
山杏江桃不當春

余元祐六年六月罷著作佐郎除秘書丞是歲仲

冬復除著作郎兼史院檢討復至舊局題屏

庭樹應知我相逢益老蒼別來秋苦雨但見瓦松長



宋詩鈔卷三十一